

# YEXUS KHETOS TXOJ MOO ZOO





## YEXUS KHETOS TXOJ MOO ZOO YOG DAB TSI?

Yexus Khetos txoj moo zoo yog Leej Txiv Saum Ntuj Ceeb Tsheej txoj hau kev rau Nws cov me nyuam tau kev zoo siab thiab **kev txhiv dim\***. Nws hu ua Yexus Khetos txoj moo zoo vim hais tias Yexus Khetos txoj **Kev Theej Txhoj** ua lub hauv paus rau Leej Txiv Saum Ntuj Ceeb Tsheej txoj hau kev. Raws li Nws txoj hau kev hais, Leej Txiv Saum Ntuj Ceeb Tsheej tau xa Nws tus Tub, Yexus Khetos, los nyob hauv ntiaj teb kom thiaj qhia peb tias peb yuav tsum ua neej nyob li cas kom peb thiaj muaj kev zoo siab thiab yuav tau kev xyiv fab tas mus li tom qab lub neej no. Los ntawm Yexus Khetos txoj **kev tshav ntuj** thiab kev hlub tshua, koj tshem tau koj tej kev txhaum kom koj huv thiab yuav muaj kev thaj yeeb nyab xeeb. Koj thiaj yuav tsum nyog mus nrog Leej Txiv Saum Ntuj Ceeb Tsheej nyob ua ke tom qab lub neej no.

Kom thiaj tau kev thaj yeeb thiab lub dag zog no, koj yuav tsum kawm thiab ua raws li tej ntsiab cai thiab **kab ke** hauv txoj moo zoo. Ib txoj ntsiab cai yog ib qho tseeb uas yus muab nruab tau rau hauv yus lub neej; ib txoj kab ke yog ib yam dawb ceev uas yus siv txoj cai ntawm lub pov thawj hwj thiaj ua tau thiab feem ntau thaum ua li no yus nrog Leej Txiv Saum Ntuj Ceeb Tsheej sib **khi lus** tseg. Thawj ob txoj ntsiab cai hauv txoj moo zoo yog kev ntseeg Yexus Khetos thiab kev hloov siab lees txim. Thawj ob txoj kab ke hauv txoj moo zoo yog **kev cai raus dej** thiab kev txais yuav tus Vaj Ntsuj Plig Dawb Huv.

Tom qab koj kawm txog thiab ua raws li thawj cov ntsiab cai thiab kab ke hauv txoj moo zoo, koj yuav tau sim ua raws li Khetos tus yam ntxwv hauv tag nrho koj lub neej. Txoj kev rau siab ntso no hu ua “kev nyiaj kom mus txog thaum kawg.”

*Koj ua tau neej nyob raws li Yexus Khetos txoj moo zoo thaum koj:*

- *Muaj kev ntseeg txog Yexus Khetos.*
- *Hloov siab lees txim.*
- *Ua kev cai raus dej thiab txais yuav tus Vaj Ntsuj Plig Dawb Huv.*
- *Nyiaj kom mus txog thaum kawg.*

\*Tau muab cov lus uas yog xim liab txhais nyob rau hauv phab ntawv 18 thiab 19.

## TXOJ KEV NTSEEG YEXUS KHETOS

Kev ntseeg yog thaum yus cia siab ces yus thiaj kam ua ib yam dab tsi. Kev ntseeg uas pab tib neeg txais kev zam txim rau lawv tej kev txhaum tso Yexus Khetos ua lub hauv paus, vim hais tias Nws txoj Kev Theej Txhoj yog qhov uas pab lawv txais kev zam txim. Kev ntseeg Yexus Khetos tsis yog lam cia siab rau Nws xwb. Nws yog thaum yus ntseeg hais tias Yexus yog Vajtswv tus Tub thiab tias

Nws tau raug kev txom nyem rau koj tej kev txhaum, kev nyuaj siab, thiab kev mob. Nws txhais tau hais tias ua hauv lwm vim muaj kev ntseeg ntawd. Kev ntseeg Yexus Khetos pab yus hlub Nws, tso siab rau Nws, thiab ua raws li Nws cov lus txib.

*“Koj yuav tsum tso siab plhuav rau tus Tswv kawg koj lub siab lub ntsws, tsis txhob cia siab rau koj tej tswv yim.*

*“Thaum koj yuav ua ib yam dab tsi twg koj yuav tsum vam khom tus Tswv nws thiaj yuav koj koj txoj hau kev tsis pub koj yuam kev.”*

**Paj Lug 3:5-6**

## KEV HLOOV SIAB LEES TXIM

Kev ntseeg Yexus Khetos yuav ua rau koj xav pauv koj lub neej kom zoo dua. Thaum uas koj kawm txoj moo zoo, koj yuav pom hais tias koj twb ua txhaum lawm, los yog hais tias tsis tau ua raws li Vajtswv lub siab nyiam thiab tej kev qhia. Dhau ntawm kev hloov siab lees txim, koj pauv koj tej kev xav, tej kev


ntshaw, yus tus cwj pwm, thiab tej yam uas tsis haum nrog Vajtswv tej kev qhia. Nws cog lus rau koj tias thaum koj hloov siab lees txim, Nws yuav zam txim rau koj tej kev txhaum. Thaum koj hloov siab lees txim koj:

**Pom** hais tias koj tau ua txhaum thiab muaj kev tu siab tiag tiag rau tej yam uas koj tau ua lawm.

**Tsum** tsis txhob ua tej yam tsis yog, thiab sim tsis txhob ua dua ib zaug.

**Lees** koj tej kev txhaum rau tus Tswv thiab thov kom tau kev zam txim. Thaum ua li no koj thiaj tsis ris nra hnyav. Yog tias koj tau ua txhaum rau lwm tus neeg, koj kuj yuav tsum thov txim ntawm tus neeg ntawd thiab.





**Muab kho.** Ua txhua yam koj ua tau kom thiaj kho tau qhov teeb meem uas muaj vim koj ua txhaum.

**Ceev cov lus txib.** Txoj kev ua raws li Vajtswv cov lus txib yuav coj lub hwj chim ntawm txoj moo zoo los rau hauv koj lub neej. Txoj moo zoo yuav pab koj muaj dag muaj zog koj thiaj tso tau koj tej kev txhaum tseg. Yus ua raws li cov lus txib thaum yus ua hauj lwm pab lwm tus neeg, zam txim rau luag lwm tus, thiab mus koom lub Koom Txoos tej kev sib ntsib.

**Lees paub tus Cawm Seej.** Qhov tseem ceeb tshaj plaws ntawm kev hloov siab lees txim yog qhov uas yus to taub tias kev zam txim los tau rau yus vim muaj Yexus Khetos. Tej thaum koj tau xav hais tias Vajtswv yuav tsis zam txim rau tej kev txhaum loj heev. Tiam sis tus Cawm Seej tau raug txom nyem rau peb tej kev txhaum xwv kom peb thiaj tso tau tej no tseg, txawm tias yog tej kev txhaum loj heev los xij. Thaum hloov siab lees txim tiag tiag yus thiaj tau kev zam txim, kev thaj yeeb, kev nplij siab, thiab kev xyiv fab.

Txoj kev hloov siab lees txim tsis yog hais tias koj yuav tsum pauv loj loj txhua lub sij hawm. Feem ntau nws tsuas yog kom koj haj yam rau siab ntso ua raws li Vajtswv lub siab nyiam xwb. Txoj kev hloov siab lees txim tiag tiag tsis yog ib qho sai sai; ua siab ntev rau koj tus kheej thaum koj siv zog sim ua qhov yog thiab kho txhua yam uas koj ua yuam kev lawm. Thaum uas koj hloov siab lees txim, koj lub siab yuav hloov hlo. Koj yuav tsis muaj lub siab xav ua txhaum lawm. Koj yuav kawm paub tias koj yog Vajtswv ib tug me nyuam thiab tias koj tsis tas pheej ua tej kev txhaum qub dua. Koj yuav haj yam muaj lub siab xav raws Vajtswv qab.

*Peb txhua tus yeej ua yuam kev. Tej thaum peb ua rau peb tus kheej raug mob thiab ua rau lwm tus mob siab es peb muab kho tsis tau peb tus kheej. Peb ua rau tej yam puas uas peb kho tsis tau peb tus kheej thiab. Lub hwj chim ntawm txoj Kev Theej Txhoj thiaj yog qhov uas kho tau tej yam uas peb tsis txawj kho.*

## KEV CAI RAUS DEJ THIAB TUS VAJ NTSUJ PLIG DAWB HUV

Kev ntseeg Yexus Khetos thiab kev hloov siab lees txim npaj koj los ua kev cai raus dej thiab txais yuav tus Vaj Ntsuj Plig Dawb Huv. Yexus Khetos tau qhia tias txhua tus neeg yuav tsum ua kev cai raus dej ntawm dej thiab tus Ntsuj Plig (tus Vaj Ntsuj Plig Dawb Huv) kom thiaj tau kev txhiv dim, los sis kev zam txim, rau tej kev txhaum. Dhau ntawm qhov uas ib tug neeg uas muaj txoj cai ntawm lub pov thawj hwj muab yus ua kev cai raus dej thiab thaum txais yuav tus Vaj Ntsuj Plig Dawb Huv, koj sab ntsuj plig thiaj yuav yug dua tshiab.

### Vim Li Cas Kuv Thiaj Yuav Tsum Ua Kev Cai Raus Dej?

Yexus Khetos tau ua yam ntxwv rau peb thaum Nws ua kev cai raus dej kom thiaj “ua txhua yam raws li Vajtswv pom zoo kom peb ua” (Mathais 3:15). Thaum koj ua kev cai raus dej, koj yuav tau kev zam txim rau koj tej kev txhaum (saib Cov Tub Txib 2:38). Koj nrog Vajtswv sib khi lus, los sis cog lus tseg: koj cog lus

tias koj yuav txais yuav Yexus Khetos ua koj tus Cawm Seej, yuav raws Nws qab, thiab yuav ceev Nws cov lus txib. Yog tias koj ua raws li koj tau cog lus lawm, Leej Txiv Saum Ntuj Ceeb Tsheej cog lus tias nws yuav zam txim rau koj tej kev txhaum. Thaum ib tug neeg uas muaj txoj cai yog muab koj ua kev cai raus dej, koj tej kev txhaum raug muab ntxuav mus.

Kev cai raus dej muaj txoj kev mus hauv qab thu dej kiag. Yexus Khetos tau ua kev cai raus dej ib yam li no thiab. Txoj

kev cai raus dej thaum mus hauv qab thu dej li no ua ib lub cim dawb ceev txog Yexus Khetos kev tuag, kev faus, thiab Kev Sawv Rov Los; nws ua piv txwv tias koj tso koj lub qub neej tseg thiab pib ib lub neej tshiab ua ib tug ntseeg Yexus Khetos.

### Vim Li Cas Kuv Thiaj Yuav Tsum Txais Yuav tus Vaj Ntsuj Plig Dawb Huv?

Ib yam li kev cai raus dej ntxuav koj tej kev txhaum mus, tus Vaj Ntsuj Plig Dawb Huv ua kom koj dawb huv, los yog ua neeg huv

*“Yexus teb hais tias,  
Kuv qhia tseeb rau koj hais  
tias, tus uas tsis yog dej  
thiab Vajtswv tus Ntsuj  
Plig yug, tus ntawd yeej  
yuav tsis tau ua Vajtswv  
hauv neeg ib zaug li.”*

**Yauhas 3:5**

*Yauhas tus uas Muab Neeg ua Kev Cai Raus Dej tau muab Yexus Khetos ua kev cai raus dej.*





huv. Yog tias koj rau siab ntso ua raws li koj tau khi lus tseg thaum koj ua kev cai raus dej, tus Vaj Ntsuj Plig Dawb Huv yuav nrog nraim koj nyob txhua txhua lub sij hawm. Txhua tus neeg zoo yeej hnov tau tus Vaj Ntsuj Plig Dawb Huv kev tshoov siab, tiam sis tsuas yog cov neeg uas tau ua kev cai raus dej thiab tau txais yuav tus Vaj Ntsuj Plig Dawb Huv lawm muaj cai muaj Nws ua lawv tus khub hauv tag nrho lub neej no.

Tus Vaj Ntsuj Plig Dawb Huv pab koj pom thiab to taub qhov tseeb. Nws pab koj sab ntsuj plig muaj zog thiab hnov tau kev tshoov siab. Nws nplij koj thaum koj muaj kev nyuaj siab thiab coj koj kev thaum twg koj yuav tsum txiav txim siab. Koj yeej hnov tau Vajtswv txoj kev hlub thiab kev pab txhua txhua hnub hauv koj lub neej los ntawm tus Vaj Ntsuj Plig Dawb Huv.

**K**oj muaj cai txais tus Vaj Ntsuj Plig Dawb Huv tej kev qhia thiab kev coj. “Tus Pab ntawd yog tus Vaj Ntsuj Plig Dawb Huv uas kuv Txiv txib sawv kuv cev los, Nws yuav qhia txhua yam rau nej, thiab pab kom nej cim ntsoov ib puas tsav yam uas kuv twb qhia rau nej lawm.”

**Yauhas 14:26**

Koom Txoos thiab foom koob hmoov rau koj kom koj thiaj yuav txais tus Vaj Ntsuj Plig Dawb Huv. Feem ntau yuav ua txoj kab ke no hauv ib txoj kev sib ntsib hauv lub koom txoos tsis ntev tom qab koj ua kev cai raus dej. Thaum koj ua kev cai raus dej thiab kev pom zoo tas, koj thiaj peem los ua ib tug mej zeej hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg.

Koj yuav muaj cuab kav txais yuav qhov khoom plig los saum ntuj los no thaum uas koj ua raws li Vajtswv cov lus txib. Tus Vaj Ntsuj Plig Dawb Huv nyob tsis tau nrog cov neeg uas tsis ua raws li Vajtswv cov lus qhia. Lawv thiaj tsis muaj cai muaj Nws txoj kev pab thiab kev tshoov siab. Koj yuav tsum siv zog sim ua neeg tsim nyog txais yuav tus Vaj Ntsuj Plig Dawb Huv kev pab thiab kev ua koj tus khub.

Koj yuav txais tus Vaj Ntsuj Plig Dawb Huv tom qab ua kev cai raus dej tas. Hauv ib txoj kab ke hu ua **kev pom zoo**, ib tug los sis ob peb tug neeg uas tuav lub pov thawj hwj yuav tso tes rau saum koj lub taub hau. Lawv pom zoo rau koj ua ib tug mej zeej hauv lub

\*Tau muab cov lus uas yog xim liab txhais nyob rau hauv phab ntawm 18 thiab 19.

**Tib neeg tso tes rau yus taub hau yus thiaj txais tau tus Vaj Ntsuj Plig Dawb Huv.**





## Lub Cim Nco Txog

Tom qab koj ua kev cai raus dej, txhua lub lim tiam koj muaj cai rov qab sib khi lus ib yam li thaum ua kev cai raus dej thaum koj noj lub **cim nco txog**.

Nyob hauv txoj kev sib ntsib noj lub cim nco txog, lawv yuav foom koob hmoov rau khob cij thiab dej thiab muab yais rau txhua tus neeg ua ib lub cim nco txog Yexus Khetos txoj Kev Theej Txhoj. Daim khob cij ua piv

txwv txog Nws lub cev, thiab cov dej ua piv txwv txog Nws cov ntshav. Thaum uas koj rov qab sib khi lus ib yam li thaum koj ua kev cai raus dej, koj tau kev cog lus tseg tias koj yuav muaj tus Ntsuj Plig, los sis tus Vaj Ntsuj Plig Dawb Huv, nrog nraim koj nyob txhua lub sij hawm.

*Lub cim nco txog pab koj muaj kev ris txiaj thaum nco qab ntsoov txog Yexus Khetos txoj Kev Theej Txhoj, Nws txoj hauj lwv, thiab tej lus qhuab qhia.*

\*Tau muab cov lus uas yog xim liab txhais nyob rau hauv phab ntawv 18 thiab 19.

## KEV NYIAJ KOM MUS TXOG THAUM KAWG

Koj rais los mus ua ib tug mej zeej hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg los ntawm kev ntseeg Yexus Khetos, kev hloov siab lees txim, thiab ob txoj kab ke ntawm kev cai raus dej thiab kev pom zoo. Tom qab koj los ua ib tug mej zeej hauv lub Koom Txoos lawm, koj tseem yuav loj hlob tuaj ntxiv. Koj tseem yuav tau muaj kev ntseeg txog Yexus Khetos, yuav tau hloov siab lees txim, rov qab sib khi lus ib yam li thaum ua kev cai raus dej thaum koj noj lub cim nco txog, thiab ua raws li tus Vaj Ntsuj Plig Dawb Huv txoj kev coj. Thawj cov ntsiab cai thiab kab ke ntawm txoj moo zoo yog ib tug qauv rau koj tau yoog hauv tag nrho koj lub neej. Txoj kev rau siab ntso hauv tag nrho lub neej no hu ua “kev nyiaj kom mus txog thaum kawg.”

Txoj kev nyiaj kom mus txog thaum kawg coj koj kev thiab coj kev thaj yeeb nyab xeeb thiab kev zoo siab los rau hauv lub neej no. Koj yuav muaj kev xyiv fab thaum koj sim ua neeg zoo li Yexus Khetos thaum uas koj ua hauj lwm thiab pab cov neeg uas nyob ntawm koj ib ncig. Koj yuav haj yam to taub tias koj nrog Leej Txiv Saum Ntuj Ceeb Tsheej sib txheeb li cas thiab hnov Nws txoj kev hlub koj. Koj thiaj muaj kev cia siab thiab paub hais tias koj lub neej muaj ib lub ntsiab zoo txawm tias lub ntiat teb no muaj kev nyuaj siab thiab kev kub ntxhov los xij.

*Y*exus Khetos txoj moo zoo yog

*ib txoj kev ua neej nyob.*

*“Yog li ntawd, nej yuav tsum thawb mus lawm tom hauv ntej nrog txoj kev ntseeg khov kho hauv Khetos, muaj ib txoj kev cia siab uas ci kawg nkaus, thiab muaj ib txoj kev hlub ntawm Vajtswo thiab ntawm tib neeg sawv daws. Yog li ntawd, yog tias nej yuav thawb lawm tom ntej hauv ntej, mloog nkaus rau Khetos tej lus, thiab tiv kom mus txog thaum kawg, saib seb, Leej Txiv hais li no tias: Nej yuav muaj txoj sia nyob mus ib txhis.”*

**2 Nifais 31:20**





## KUV YUAV UA LI CAS THIAJ PAUB?

Los ntawm Vajtswv tej kev tshwm sim uas Nws muab rau tus Yaj Saub Yauxej Xamiv thiab lwm cov yaj saub thiaj tau muab Yexus Khetos txoj moo zoo txum tim rov qab los lawm.

Koj yeej muaj cai paub tias txoj xov no muaj tseeb yog tias koj nug koj Leej Txiv Saum Ntuj Ceeb Tsheej thaum koj thov Vajtswv. Nws yuav siv tus Vaj Ntsuj Plig Dawb Huv teb koj zaj lus thov, tus no kuj muaj npe hu ua Vajtswv tus Ntsuj Plig, tus Vaj Ntsuj Plig Dawb Huv ua tim khawv, los sis ua pov thawj, txog Leej Txiv Saum Ntuj Ceeb Tsheej thiab Yexus Khetos. Tus Vaj Ntsuj Plig Dawb Huv ua tim khawv txog qhov tseeb los ntawm yus tej kev xav, hauv paj hlwb thiab hauv yus lub siab. Tej kev xav uas los ntawm tus Vaj Ntsuj Plig Dawb Huv los, yeej muaj hwj chim, tiam sis feem ntau yog ib yam me me thiab ntsiag to. Ib yam li muaj sau tseg hauv phau Vaj Lug Kub Npaiv Npaum, “Vajtswv tus Ntsuj Plig ua rau neeg muaj lub siab hlub, zoo siab, nyob kaj siab lug, ua siab ntev, muaj lub siab zoo, zoo siab hlo pab luag, ua siab ncaj, tsis khav txiv, thiab ua rau neeg paub tswj neeg lub siab” (Kalatias 5:22–23).

Tej kev xav no yog ib qho tim khawv ntawm tus Vaj Ntsuj Plig Dawb Huv tias txoj xov no muaj tseeb. Ces thaum ntawd koj yuav tau txiav txim siab seb koj puas kam ua raws li Yexus Khetos txoj moo zoo uas nws tau muab txum tim rov qab los dhau ntawm Yauxej Xamiv.

### *Kuv Yuav Thov Vajtswv Li Cas?*

- *Tuav koj Leej Txiv Saum Ntuj Ceeb Tsheej lub npe*
- *Hais qhia txog tej koj tej kev xav hauv koj nruab siab (kev ris txiaj, cov lus nug, thov seb Phau Ntaww Maumoos thiab tej yam uas cov tub txib tau qhia puas muaj tseeb).*
- *Xaus (“Nyob ntawm Yexus Khetos lub npe, amees”).*

## KEV QHIA TXOG COV LUS

**Lub Cim Nco Txog** Ib txoj kab ke uas pab lub Koom Txoos cov mej zeej nco txog Yexus Khetos txoj Kev Theej Txhoj. Thaum noj lub cim nco txog, peb rov qab sib khi lus tseg ib yam li thaum peb tau ua kev cai raus dej. Ces yuav yais cov khob cij thiab dej uas twb foom koob hmoov rau lawm rau sawv daws. Daim khob cij ua piv txwv txog Yexus Khetos lub cev, thiab cov dej ua piv txwv txog Nws cov ntshav. Yuav muaj txoj kab ke no txhua lub lim tiam hauv ib txoj kev teev tiam uas peb hu ua txoj kev sib ntsib noj lub cim nco txog.

**Kab Ke** Ib txoj kab ke dawb ceev, uas siv txoj cai ntawm lub pov thawj hwj thiaj ua tau. Piv xam hais tias kev cai raus dej, txais tus Vaj Ntsuj Plig Dawb Huv, thiab lub cim nco txog. Feem ntau tej kab ke no cia peb nrog Vajtswv sib khi lus tseg.

**Kev Cai Raus Dej** Ib qho tseem ceeb yuav tsum ua kom thiaj tau kev zam txim rau kev txhaum. Los ntawm txoj kev cai raus dej thiab kev pom zoo ntawm txoj cai ntawm lub pov thawj hwj, peb thiaj peem los ua mej zeej hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg. Kev cai raus dej yog kev raus dej kiag, uas txhais tau hais tias tus neeg uas ua kev cai raus dej mus hauv qab thu dej tag nrho. Kev cai raus dej qhia tias peb kam ua raws li Khetos tus yam ntxwv thiab nrog Vajtswv sib khi lus tseg.

**Kev Cawm Seej** Txoj kev dim txim ntawm kev txhaum thiab kev tuag. Yeej muaj kev cawm seej vim tau muaj Yexus Khetos txoj Kev Theej Txhoj. Dhau ntawm Yexus Khetos txoj Kev Theej Txhoj, txhua leej txhia tus yuav kov yeej kev tuag. Peb los kuj dim tau peb lub txim ntawm peb tej kev txhaum yog tias peb ntseeg Yexus Khetos. Peb qhia peb txoj kev ntseeg thaum peb hloov siab lees txim thiab ua raws li tej kev cai thiab kab ke hauv txoj moo zoo thiab ua hauj lwm pab Khetos.

**Kev Pom Zoo** Qhov uas ib tug neeg ua thiaj txais tau tus Vaj Ntsuj Plig Dawb Huv. Nyob hauv txoj kab ke no, uas feem ntau yuav ua hauv ib txoj kev sib ntsib noj lub cim nco txog tsis ntev tom qab ua kev cai raus dej, yuav pom zoo rau tus neeg ntawd, los sis tsa nws, ua ib tug mej zeej hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyooog Kawg.

**Kev Theej Txhoj** Qhov uas cia peb rov los nrog Vajtswv sib raug zoo. Txoj kev theej yog txoj kev raug txim rau ib qho kev txhaum, ua li thiaj tau tshem kev txhaum ntawm cov neeg uas hloov siab lees txim. Yexus Khetos yog tib tug neeg uas muaj peev xwm ua Kev Theej Txhoj zoo tag nrho rau noob neej sawv daws. Nws txoj Kev Theej Txhoj muaj Nws txoj kev raug txom nyem rau peb tej kev txhaum, qhov uas Nws los ntshav nrog, thiab Nws txoj kev tuag thiab Kev Sawv Rov Los. Vim hais tias muaj Kev Theej Txhoj, txhua tus neeg uas tau ua neej nyob yeej yuav sawv rov qab los thiab. Txoj Kev Theej Txhoj kuj ua rau peb thiaj txais tau kev zam txim rau peb tej kev txhaum thiab nrog Vajtswv nyob ua ke tas mus li.

**Kev Tshav Ntuj** Kev pab thiab lub dag lub zog uas los saum ntuj los vim muaj Yexus Khetos txoj kev hlub tshua thiab kev hlub. Dhau ntawm Nws txoj kev tshav ntuj, vim muaj Nws txoj Kev Theej Txhoj, tib neeg sawv daws yuav sawv rov los. Dhau ntawm Nws txoj kev tshav ntuj, cov neeg uas pheej hloov siab lees txim thiab ua neej nyob raws li Nws txoj moo zoo qhia yuav txav los nyob Leej Txiv Saum Ntuj Ceeb Tsheej hauv lub neej no thiab yuav nrog Nws nyob tom qab lub neej no.

**Khi Lus** Ib txoj kev uas Vajtswv thiab Nws cov me nyuam sib yeem lus. Vajtswv tsa tej kev cai rau kev sib khi lus, thiab peb yeem hais tias peb mam li ua raws li Nws hais. Vajtswv cog lus tias peb yuav tau tej koob hmoov thaum peb mloog lus.

## **TXOJ KEV KAWM NTXIV**

Cov lus nug thiab nqe vaj lug kub nram qab no yuav pab koj kawm ntxiv txog tej ntsiab cai hauv daim ntawv no thiab ntsuam xav txog tej no. Daim no tsis qhia txhij txhua; cov ntawv nram qab thiab cov ntawv uas qhia txog lwm cov nqe vaj lug kub yuav pab koj koj mus rau lwm cov nqe thiab ntaub ntawv uas yuav pab koj.

### **Yexus Khetos txoj moo zoo yog dab tsi?**

3 Nifais 27:13–22 (Phau Ntawv Maumoos, phab 632–34)

---

---

---

### **Muaj kev ntseeg txhais tau li cas?**

#### **Txoj kev muaj kev ntseeg yuav pab koj muaj dag muaj zog li cas?**

Hinplus 11:1, 6 (Phau Vaj Lug Kub Npaiv Npaum, Phau Tshiab)

Amas 32:21, 26–28 (Phau Ntawv Maumoos, phab 393–94)

Ethaws 12:6 (Phau Ntawv Maumoos, phab 701)

---

---

---

### **Txoj kev hloov siab lees txim txhais tau li cas?**

#### **Vim li cas txhua leej txhia tus thiaj yuav tsum hloov siab lees txim?**

Lukas 15:3–10 (Phau Vaj Lug Kub Npaiv Npaum, Phau Tshiab)

Cov Tub Txib 3:19 (Phau Vaj Lug Kub Npaiv Npaum, Phau Tshiab)

Amas 12:33–34 (Phau Ntawv Maumoos, phab 323)

---

---

---

**Vim li cas txhua leej txhia tus thiaj yuav tsum ua kev cai raus dej?**

Cov Tub Txib 2:38 (Phau Vaj Lug Kub Npaiv Npaum, Phau Tshiab)

2 Nifais 31–32 (Phau Ntawv Maumoos, phab 151–55)

---

---

---

**Tus Vaj Ntsuj Plig Dawb Huv yog leej twg?**

**Tus Vaj Ntsuj Plig Dawb Huv yuav foom koob hmoov  
rau koj lub neej li cas?**

2 Nifais 32:5 (Phau Ntawv Maumoos, phab 154)

3 Nifais 27:20 (Phau Ntawv Maumoos, phab 633)

---

---

---

**Lub ntsiab rau lub cim nco txog yog dab tsi?**

3 Nifais 18:1–12 (Phau Ntawv Maumoos, phab 610–11)

Maulaunais 4–5 (Phau Ntawv Maumoos, phab 716)

---

---

---

**Txoj kev nyiaj kom mus txog thaum kawg txhais tau li cas?**

2 Nifais 31:15–20 (Phau Ntawv Maumoos, phab 153–54)

3 Nifais 15:9 (Phau Ntawv Maumoos, phab 604)

---

---

---

## CIA LI NROG PEB TEEV TIAM

TUJ THIAB SAIB SEB TXOJ MOO ZOO UAS  
RAUG TXUM TIM ROV QAB LOS LAW M FOOM TAU  
KOOB HMOOV LI CAS RAU KOJ LUB NEEJ



Txoj kev sib ntsib noj lub cim nco txog yog qhov tseem ceeb tshaj plaws ntawm peb txoj kev teev tiam. Feem ntau kev sib ntsib no kav ib xuab moos tawm thiab yuav muaj tej yam zoo li no:

*Zaj nkauj qhuas Vajtsww:* Pawg ntseeg sawv daws sib koom hu. (Yeej muaj tej phau nkauj rau sawv daws.)

*Kev thov Vajtsww:* Cov mej zeej hauv lub Koom Txoos yog cov uas thov.

*Lub cim nco txog:* Yuav foom koob hmoov rau khob cij thiab dej ces yais rau sawv daws noj thiab haus kom thiaj nco txog Yexus Khetos txoj Kev Theej Txhoj.

*Cov neeg hais lus:* Feem ntau yuav xub thov ib los sis ob tug mej zeej los hais lus txog tej ntsiab cai ntawm txoj moo zoo.

*Hnav khaub ncaws li cas:* Feem ntau cov txiv neej thiab cov tub hnav ib cev xuv los sis ris zoo thiab ib lub tsho thiab txoj kas las vav. Cov poj niam thiab ntxhais hnav tiab tsho los sis daim tiab.

Lawv yeej tsis thov nyiaj hauv tej kev teev tiam no.

Peb kuj caw koj tuaj koom lwm txoj kev sib ntsib, nyob ntawm seb koj xav kawm li cas thiab muaj hnuv nyooq li cas. Txhua qhov chaw nyias muaj nyias tej kev sib ntsib no.

*Hnuv Caiv Kev Kawm Vaj Lug Kub:* Tej hoob rau kev kawm cov vaj lug kub thiab cov lus qhuab qhia ntawm txoj moo zoo.

*Kev sib ntsib rau lub Pov Thawj Hwj:* Tej hoob rau cov txiv neej thiab tub hluas uas muaj 12 xyoos rov saum.

*Koom Haum Niam Tsev:* Tej hoob rau cov poj niam uas muaj 18 xyoo rov saum.

*Koom Haum Ntxhais Hluas:* Tej hoob rau cov ntxhais hluas uas muaj 12 mus rau 18 xyoo.

*Koom Haum Me Nyuam Yaus:* Kev sib ntsib ua ke thiab tej hoob rau cov me nyuam uas muaj 3 mus rau 11 xyoos. Feem ntau yuav muaj ib hoob zov cov me nyuam uas muaj 18 hli mus rau 3 xyoos.




Txoj kev sib ntsib noj lub cim nco txog pib thaum: \_\_\_\_\_

Tsev teev ntuj chaw nyob yog: \_\_\_\_\_

\_\_\_\_\_

# Kuv Yuav Tsum Ua Li Cas?



- Nyeem Phau Ntawv Maumoos.  
Yaum kom nyeem tej no: \_\_\_\_\_
  - Thov Vajtswo kom thiaj paub tias Yexus Khetos yog koj tus Cawm Seej.
  - Hloov siab thiab thov Vajtswo zam txim rau koj. Sim ua neej nyob raws nraim li Vajtswo cov lus txib.
  - Mus xyuas lub koom txoos.
  - Npaj yuav ua kev cai raus dej thaum hnuv tim \_\_\_\_\_
  - Xyuas [www.mormon.org](http://www.mormon.org) kom thiaj kawm tau ntxiv txog Yexus Khetos txoj moo zoo uas raug muab txum tim rov qab los lawm.
  - Pheej nrog cov tub txib sib ntsib ua ke kom thiaj kawm tau ntxiv txog tej kev tseeb uas Vajtswo tau muab txum tim rov qab los rau cov yaj saub hauv lub caij nyoog kawg no.
- Rov qab teem caij thaum: \_\_\_\_\_
- Cov tub txib tej npe thiab naj npawb xov tooj: \_\_\_\_\_
- \_\_\_\_\_
- \_\_\_\_\_

**YEXUS KHETOS**  
LUB KOOM TXOOS  
NTAWM TSOOM  
HAIV NEEG NTSEEG  
HAUV HNUV NYOOG KAWG

[www.mormon.org](http://www.mormon.org)

**Cov Kws Kos Duab**

Daim plhaub tom hau ntej: Tau los ntawm Cov Dej Uas Cawm Neeq Txoj Sia, tus kos yog Simon Dewey. © Simon Dewey.  
Tsis txhob muab luam tawm  
Phab 2: Tau los ntawm Cov Lus Qhuab Qhia saum Roob, tus kos yog Carl Heinrich Bloch. Tau cai siv daim duab no los ntawm lub Teb Chaws Lub Tsev Khaws Duab nyob tom Frederiksberg hauv Hillerød, Denmark teb  
Phab 5: Khetos Tab Tom Tsa Laxalaus tus Nthais, tus kos yog Greg K. Olsen. © Greg K. Olsen  
Phab 6: Tus Kws Kho Mob Zoo, tus kos yog Greg K. Olsen. © Conceptions Unlimited Investments, Inc. Tsis thob muab luam tawm  
Phab 9: Yauhas tus uas Muab Neeq Ua Kev Cai Raus Dej Tab Tom Muab Yexus Ua Kev Cai Raus Dej, tus kos yog Greg K. Olsen. © Greg K. Olsen. Tsis thob muab luam tawm

HMONG



01142 295